



TOSHKENT DAVLAT YURIDIK UNIVERSITETI REKTORINING B U Y R U G ' I

24.02.2023

37-um-son

Toshkent davlat yuridik universitetida 8-mart – Xotin-qizlar kuni bayramini munosib kutib olish va o‘tkazish to‘g‘risida

Olijanob xalqimizda uzoq yillar davomida shakllanib kelayotgan va milliy qadriyat sifatida qadrlanadigan ayollarni e‘zozlash, ularga hurmat va ehtirom ko‘rsatish kabi an‘analarimizni munosib davom ettirish, Toshkent davlat yuridik universitetining dilbar ayollari va lobar qizlari, ularning timsolida butun xotin-qizlarini 8-mart – Xotin-qizlar kuni bayrami bilan munosib tabriklash, ularga ehtirom ko‘rsatish hamda Xotin-qizlar kuni bayramini yuqori saviyada tashkil etish maqsadida,

BUYURAMAN

1. 8-mart – Xotin-qizlar kuni bayrami munosabati bilan Toshkent davlat yuridik universiteti (bundan buyon matnda – Universitet)da “Ayolga baxt bering – saodat bering!” shiori ostida bayram tadbirlari yuqori saviyada tashkil etilsin.

Bunda,

talaba qizlar uchun an‘anaviy tarzda o‘tkazilib kelinayotgan “Mis yurist” tanlovining 2023-yilgi bosqichini yuqori saviyada tashkil etiladi;

universitet ayol xodimlarini munosib taqdirlash va qo‘llab-quvvatlash uchun barcha ayol xodimlar ishtirok etishi mumkin bo‘lgan 8 ta nominatsiyadan iborat “Yurist ayollar” nomli ochiq tanlov o‘tkaziladi;

sana munosabati bilan universitetda bayram tadbiri tashkil etiladi.

2. “Miss yurist – 2023” ko‘rik-tanlovini tashkil etish tartibi 1-ilovaga, “Yurist ayollar” tanlovini o‘tkazish tartibi 2-ilovaga hamda tanlovga kelib tushgan arizalarni ko‘rib chiqish bo‘yicha komissiya tarkibi 3-ilovaga muvofiq tasdiqlansin.

3. Yoshlar masalalari va ma‘naviy-ma‘rifiy ishlar bo‘yicha birinchi prorektor A.Xashimhonov:

8-mart – Xotin-qizlar kuni bayrami munosabati bilan universitetda o‘tkaziladigan bayram tadbirlari, ko‘rik-tanlovlarini yuqori saviyada tashkil etish, universitet binolarida bayram shukuhini yaratish universitet jamoasining ayollarga bo‘lgan munosib hurmat va ehtiromini ayollarga yetkazish choralarini ko‘rsin;

talaba-qizlar o'rtasida o'tkaziladigan "Miss yurist – 2023" ko'rik-tanlovi va ayol xodimlar o'rtasida o'tkaziladigan "Yurist ayollar" tanlovini shaffof, ochiq-oshkora hamda adolatli tarzda o'tkazilishini nazoratga olsin.

4. Ma'naviyat va ma'rifat markazi (Sh.Po'lotov):

8-mart – Xotin-qizlar kuni bayrami munosabati bilan universitetda bayram dasturini yuqori saviyada o'tkazishga tayyorgarlik ko'rsin;

fakultet dekanlari bilan birgalikda "Miss yurist – 2023" ko'rik-tanlovi to'g'risida talabalar o'rtasida keng tushuntirish ishlarini olib borsin hamda ishtirok etish istagida bo'lgan talaba-qizlarni belgilangan me'zonlar asosida saralab ularni tanlovning universitet bosqichida munosib ishtirok etishini ta'minlash choralari ko'rsin;

"Miss yurist – 2023" ko'rik-tanlovi ishtirokchilariga tanlovga tayyorgarlik ko'rishlari uchun ko'maklashsin;

universitetda faoliyat yuritayotgan ayol xodimlar uchun o'tkaziladigan "Yurist ayollar" tanlovini yuqori saviyada tashkil etish choralari ko'rsin;

tarkibiy bo'linma rahbarlari bilan birgalikda tanlov mazmun-mohiyati va unda ishtirok etish tartibi yuzasidan universitet ayol xodimlariga keng tushuntirish va targ'ibot ishlarini amalga oshirsin;

Elektron universitet bo'limi (A.Karimov) bilan birgalikda tanlovlarni shaffof tarzda o'tishini ta'minlash maqsadida elektron platforma tayyorlash choralari ko'rsin hamda unda ovozlarni sohtalashtirish yoki inson omili aralashishini oldini olishga alohida e'tibor qaratsin.

5. Jamoatchilik va OAV bilan aloqalar bo'limi (J.Haydarov) Ma'naviyat va ma'rifat markazi (Sh.Po'lotov) bilan birgalikda:

"Miss yurist – 2023" ko'rik-tanlovi hamda "Yurist ayollar" tanlovi mazmun-mohiyatini yoritib beruvchi roliklar tayyorlab ularni universitetning Internet sayti hamda ijtimoiy tarmoqlardagi sahifalarida joylashtirish choralari ko'rsin;

tanlov jarayonlarini OAVlari orqali keng yoritish hamda jamaotchilikni xabardor qilib borish choralari ko'rsin;

bayram munosabati bilan yurtimizda ayollarga berilayotgan e'tibor, gender tengligini ta'minlash hamda xotin-qizlarni qo'llab-quvvatlashga qaratilgan ishlarning mazmun-mohiyatini yoritish maqsadida universitet jamoasining OAVlar orqali chiqishlarini tashkil etsin;

bayram munosabati bilan xotin-qizalarga universitet jamoasining bayram tabrigini tayyorlab universitetning Internet sayti hamda ijtimoiy tarmoqlardagi sahifalarida joylashtirish choralari ko'rsin.

6. Buxgalteriya (M.Parpiyev) 8-mart – Xotin-qizlar kuni bayrami munosabati bilan universitetda o'tkaziladigan ko'rik-tanlovlar hamda bayram dasturini tashkil etish bilan bog'liq sarf-xarajatlarni universitetning budjetdan tashqari mablag'lari hamda universitet kasaba uyushmasi mablag'lari (kelishuvga ko'ra) hisobidan qoplash choralari ko'rsin.

7. Mazkur buyruq ijrosi nazorati birinchi prorektor A.Xashimhonov hamda prorektor A.Iminovlar zimmasiga yuklatilsin.

Rektor v.v.b.



I.RUSTAMBEKOV

Toshkent shahar

Kiritildi:

Direktor

SH.PO‘LOTOV



Kelishildi:

Moliya-iqtisod ishlar bo‘yicha
prorektor

A.IMINOV



Devonxona mudiri

X.ABDULLAYEV



Yoshlar masalalari va ma‘naviy-
ma‘rifiy ishlar bo‘yicha birinchi
prorektor

A.XASHIMHONOV



yuriskonsult

D.ALIBOYEV



Bo‘lim boshlig‘i

S.MAMANAZAROV



Xalqaro hamkorlik va uzluksiz ta‘lim
bo‘yicha prorektor

D.UMAROV



Ilmiy ishlar va innovatsiyalar
bo‘yicha prorektor

B.XODJAYEV



Bosh buxgalter

M.PARPIYEV



Toshkent davlat yuridik universiteti talabalari-qizlari o'rtasida “Miss yurist – 2023” ko'rik-tanlovini o'tkazish tartibi

I. Umumiy qoidalar

1. “Miss yurist – 2023” ko'rik-tanlovi (bundan buyon matnda – Tanlov) Toshkent davlat yuridik universiteti (bundan buyon matnda – Universitet) talaba-qizlari o'rtasida o'tkaziladi.

2. Iqtidorli talaba-qizlarni aniqlash va rag'batlantirish, huquqiy bilimlarini yanada mustahkamlash, tanlagan kasblariga bo'lgan muhabbatni oshirish, ular o'rtasida sog'lom raqobat va ijodkorlik muhitini yaratish, erkin fikr bildirish, notiqlik mahoratini oshirish, fuqarolik pozitsiyalarini mustahkamlash, tashabbuskorlik, jamoatchilik va fidoiylilik kabi fazilatlarini shakllantirish Tanlovni o'tkazishning maqsadi hisoblanadi.

3. Ma'naviyat va ma'rifat markazi Tanlovning ishchi organi bo'lib hisoblanadi.

II. Tanlovni tashkil etish bosqichi va tartiblari

4. Tanlov ikki bosqichda amalda oshiriladi.

Birinchi bosqich – fakultet bosqichi.

Bunda ishtirok etish istagini bildirgan talaba-qizlar fakultet dekanatlari tomonidan belgilangan me'zonlar asosida ishchi komissiyalarini shakllantirgan holda kasting asosida tanlab olinadi.

Kasting jarayonlarini adolatli, ochiq, oshkora va shaffof shaklda o'tkazilishiga fakultet dekanlari mas'ul bo'lib hisoblanadi. Ishtirokchilarni tanlash, ularning tayyorgarligini baholash bilan bog'liq barcha jarayonlar fakultetlarning ijtimoiy tarmoqlardagi sahifalarida e'lon qilib boriladi.

Fakultet bosqichida talabalarining huquqiy bilimlarini, iqtidorlarini va mahoratlarini baholash uchun fakultet dekani boshchiligida ishchi guruh shakllantiriladi. Ishchi guruh tarkibi malakali professor-o'qituvchilar, xotin-qizlar masalasi bo'yicha mas'ul xodimlar va faol talabalardan shakllantiriladi.

Kasting jarayoni test va suhbat shaklida o'tkaziladi.

Testlar huquqshunoslik fani yo'nalishlari hamda mamlakat ijtimoiy va siyosiy hayotidagi islohotlar yuzasidan tuziladi.

Testdan yuqori natijani qo‘lga kiritgan talabalar bilan komissiya tomonidan suhbat qilinadi.

Suhbatda ishtirokchilar quyidagi yo‘nalishlar bo‘yicha sinovdan o‘tkaziladilar:

notiqlik mahorati;

muammoli vaziyatdan chiqa olish qobiliyati;

ijodiy va intellektual salohiyati;

ijtimoiy faolligi;

Tanlovning fakultet bosqichidan har bir fakultetdan 2 nafardan ishtirokchi tanlab olinadi va ular tanlovning universitet bosqichida ishtirok etish yo‘llanmasini qo‘lga kiritadi.

Ikkinchi bosqich – universitet bosqichi.

Tanlovning universitet bosqichida ishtirokchilar **4 ta shart** bo‘yicha o‘zaro bellashadilar.

Bunda ishtirokchilardan egallagan bilimlarini amalda ko‘rsata bilishlari, mamlakat ijtimoiy-siyosiy jarayonlari yuzasidan qonunchilikka taklif bera olishlari, tanlagan kasblariga munosibliklarini hamda muhabbatlarini ko‘rsata olishlari, o‘zlarining kiyinish madaniyati, odobi, uy-ro‘zg‘or yumushlaridagi faolliklarini hamda ijodiy salohiyatlarini namoyon etishlari talab etiladi.

1-shart: Tanishtiruv sharti. Bunda ishtirokchilar ijodiy yondashuv asosida o‘zlari haqida ma’lumot beradilar va qo‘lga kiritgan yutuqlarini ko‘rgazmali (video, foto va boshqa) shaklda namoyon etadilar.

Shu bilan birga tanishtiruv jarayonida mamlakatimiz ijtimoiy-siyosiy hayoti, fuqarolarning huquq va erkinliklarini, qonun ustuvorligini ta’minlash yuzasidan qonunchilikka **2 tadan taklif tayyorlab** uning taqdimoti amalga oshiriladi. Shart bo‘yicha ishtirokchilardan tashqari ko‘pi bilan 4 nafar yordamchi ishtirokchilar ham sahnaga chiqish huquqiga ega. Lekin yordamchi ishtirokchilar asosiy ishtirokchi sifatida sahnada ko‘rinishi mumkin emas.

Ushbu shart uchun 8 daqiqa vaqt ajratiladi hamda 5 ballik tizimda baholanadi.

Belgilangan vaqtdan oshib ketgan chiqishlarning har 30 soniyasi uchun 0,5 ball jarima (umumiy baldan) qo‘llaniladi.

2-shart: Huquqiy test sharti. Ushbu shart elektron dastur orqali amalga oshiriladi. Bunda ishtirokchilarga huquqshunoslik fani yo‘nalishlari hamda mamlakat ijtimoiy va siyosiy hayotidagi islohotlar yuzasidan 20 ta test savollar beriladi. Shart uchun umumiy 6 daqiqa vaqt ajratiladi. Barcha ishtirokchilar bir vaqtning o‘zida savollarga javob beradilar hamda ishtirokchilar bir-birlariga xalaqit

bermasligi uchun 2 metrlik masofa saqlanadi. Natijalar elektron dastur orqali avtomatik tarzda monitorda e'lon qilinadi.

Rus guruhida tahsil oladigan talabalarga savollar rus tilida taqdim etiladi.

Har bir to'g'ri javob uchun 0,5 bal, shart bo'yicha jami 10 ballni qo'lga kiritish mumkin.

3-shart: Ishtirokchilarning uy-ro'zg'or yumushlaridagi faolliklarini sinovdan o'tkazish sharti.

Ushbu shartda ishtirokchilarga uy-ro'zg'or yumushlaridagi faolliklari hamda qay darajada bajara olishlarini sinash maqsadida kutilmagan vazifa beriladi. Shart tanlov o'tkazilishi belgilangan kundan 2 kun avval o'tkaziladi hamda mutaxassislar tomonidan baholanadi. Hakamlar ishtirokchilarning tayyorgarliklarini 5 ballik tizimda baholaydi. Jarayonlar video tasvirga olinadi hamda tanlov kuni shart e'lon qilingan payt ekranda namoyish etiladi.

4-shart: Sahnaviy-chiqish sharti.

Ushbu shartda ishtirokchilar o'zbek ayol qahramonlari obrazini gavdalantiradilar. Ishtirokchi sahnalashtirgan obrazi orqali ayol etikasini, shijoati, vatanparvarlik ruhini aktyorlik mahorati orqali yoritib berishlari talab etiladi. Ishtirokchilarning qaysi obrazlarni sahnalashtirishlari tanlov o'tkaziladigan kundan kamida 15 kun avval qura tashlash yo'li bilan aniqlanadi.

Shart bo'yicha ishtirokchilardan tashqari ko'pi bilan 6 nafar yordamchi ishtirokchilar ham sahnaga chiqish huquqiga ega. Lekin yordamchi ishtirokchilar asosiy ishtirokchi sifatida sahnada ko'rinishi mumkin emas.

Ushbu shart uchun 10 daqiqa vaqt ajratiladi hamda 5 ballik tizimda baholanadi.

Belgilangan vaqtdan oshib ketgan chiqishlarning har 30 soniyasi uchun 0,5 ball jarima (umumiy baldan) qo'llaniladi.

5. Hakamlar hay'ati tarkibi ilm-fan va madaniyat sohasida yuqori natijalarga erishgan va tajribaga ega bo'lgan mutaxassislardan shakllantiriladi.

III. Rag'batlantirish

6. Tanlovining fakultet bosqichida 1-o'rinni qo'lga kiritgan ishtirokchi fakultet dekanati tomonidan darajali diplom hamda esdalik sovg'alari bilan taqdirlanadilar.

7. Tanlovning universitet bosqichida 1-o'rinni qo'lga kiritgan ishtirokchi Toshkent davlat yuridik universiteti rektori tomonidan darajali diplom, tanlov statuetkasi va lentasi hamda 5 million so'm miqdoridagi pul mukofoti bilan rag'batlantiriladi.

8. Tanlov nizomiga muvofiq g'olib ishtirokchiga tanlovning ramziy tojini hamda lentasini tantanali ravishda "Miss yurist-2022" ko'rik-tanlovi sohibasi taqdim etadi.

9. Tanlovda 2-3-o'rinlarni qo'lga kiritgan ishtirokchilar ham Toshkent davlat yuridik universiteti rektori tomonidan darajali diplom, tanlov lentasi hamda 2 million so'mdan miqdoridagi pul mukofoti bilan rag'batlantiriladi.

10. Tanlovda ishtirok etgan qolgan ishtirokchilar ham hakamlar hay'atining qarori bilan tanlovda ishtirokiga ko'ra quyidagi nominatsiyalar bo'yicha darajali diplom, tanlov toji va lentasi hamda 1 million so'mdan miqdoridagi pul mukofoti bilan rag'batlantiriladi:

"Miss clever"

"Miss sreative"

"Miss super star"

"Miss dancer"

"Miss drama"

IV. Yakuniy qoidalar

11. Bir mavsumda ko'rik-tanlovning g'olibasi bo'lgan hamda 2 va 3-o'rinni egallagan ishtirokchi-qizlar keyingi mavsumda ishtirok eta olmaydi.

12. Ko'rik-tanlovning fakultet hamda universitet bosqichi o'tkazish jarayonidan norozi bo'lgan ishtirokchilar Yoshlar masalalari va ma'naviy-ma'rifiy ishlar bo'yicha birinchi prorektorga murojaat qilishi mumkin.

13. Ko'rik-tanlovni tashkil etishda mansab suistemolligi, bir ishtirokchiga yon bosish, til biriktirish yoki korrupsion holatlar yoki boshqa qonunga xilof harakatlar aniqlanganda ushbu holatni yuzaga kelishiga sabab bo'lgan xodim yoki talabala qonun hujjatlari va universitetning ichki me'yoriy hujjatlariga muvofiq javobgar bo'ladilar.

14. Ko'rik-tanlov jarayonida yuzaga keladigan shikoyatlarni, nizo va kelishmovchiliklarni ko'rib chiqish qonun hujjatlariga muvofiq amalga oshiriladi.

Toshkent davlat yuridik universitetida faoliyat yuritadigan ayol xodimlar o'rtasida "Yurist ayollar" tanlovini o'tkazish tartibi

I. Umumiy qoidalar

1. Mazkur tartib 8-mart – Xotin-qizlar kuni bayrami munosabati bilan Toshkent davlat yuridik universiteti (bundan buyon matnda – Universitet) ayol xodimlarini munosib taqdirlash va qo'llab-quvvatlash maqsadida universitet ayol xodimlari o'rtasida o'tkaziladigan "Yurist ayollar" tanlovini o'tkazish jarayonlarini belgilaydi.

2. Tanlovga quyidagi nominatsiyalar bo'yicha universitetda faoliyat yuritayotgan barcha ayol xodimlari ishtirok etishlari mumkin:

"Mehnatkash ayol" – o'ziga yuklatilgan vazifalarni sidqidildan bajarib kelayotgan hamda mehnatsevarligi bilan universitet jamoasining hurmat va e'tirofiga sazovor bo'lib kelayotgan tarkibiy bo'linmalarda faoliyat yuritayotgan ayol xodimlar taqdirlanadi;

"Ilm-fan targ'ibotchisi" – ilm-fan sohasi rivojiga o'zining munosib hissasini qo'shib kelayotgan, ilmiy-ijodiy salohiyatidan unumli foydalanib kelayotgan va bu borada yutuqlarga erishib kelayotgan hamda universitetning milliy va xalqaro reytinglardagi o'rnini yuksaltirishdagi faolligi uchun kafedralarda faoliyat yuritayotgan ayol professor-o'qituvchilar rag'batlantiriladi;

"Tashabbuskor ayol" – mamlakat ijtimoiy-siyosiy hayotining muhim masalalari, davlat dasturlari va qonun ustuvorligini ta'minlash yuzasidan qonunchilikka taklif kiritishda faol bo'lgan hamda universitet faoliyat yo'nalishlaridan kelib chiqib o'zing harakatlari bilan universitet ko'magida loyihalarni amalga oshirib kelayotgan ayol professor-o'qituvchi va xodimlar taqdirlanadi;

"Eng yaxshi targ'ibotchi" – aholining huquqiy bilimlarini oshirish, fuqarolarda qonunlarga hurmat hamda daxldorlik ruhini shakllantirish borasida universitet oldida turgan vazifalarni amalga oshirishda faollik ko'rsatib kelayotgan, joylarda targ'ibot-tashviqot ishlarini tizimli tashkil etib kelayotgan hamda OAVlari orqali chiqishlar qilib kelayotgan kafedralarda faoliyat yuritayotgan ayol professor-o'qituvchilar rag'batlantiriladi;

"Mahoratli pedagog ayol" – yuksak pedagogik mahorati, bilimi, izlanishi bilan talabalarga bilim va ko'nikma berib kelayotgan, dars jarayonlarini sifatli olib

borishi bilan universitet jamoasi hamda talabalarning e'tirofiga sazovor bo'lib kelayotgan kafedralarda faoliyat yuritayotgan ayol professor-o'qituvchilar rag'batlantiriladi;

“Xalqaro hamkorlik faoli” – universitetning xalqaro tashkilotlar va muassasalar bilan aloqalarini yanada mustahkamlash, xalqaro hamkorlik yo'nalishidagi topshiriq va vazifalarni sifatli bajarib kelayotgan hamda xalqaro hamkor tashkilotlar va muassasalarning e'tirofiga sazovor bo'lib kelayotgan ayol professor-o'qituvchi va xodimlar taqdirlanadi;

“Eng fidoiy ayol” – uzoq yillar davomida universitetda faoliyat yuritib kelayotgan hamda o'zining fidoiy mehnati bilan universitet jamoasining e'tirofiga sazovor bo'lib kelayotgan ayol xodimlar taqdirlanadilar;

“Universitet bekasi” – universitetning ozodaligiga, saramjon muhitni yaratishda o'zining hissasini qo'shib kelayotgan va mashaqqatli mehnati bilan universitet jamoasining hurmati va e'tirofiga sazovor bo'lib kelayotgan ayol xodimlar taqdirlanadilar.

3. Ma'naviyat va ma'rifat markazi tanlovni o'tkazishning ishchi organi hisoblanadi.

II. Tanlovni o'tkazish tartibi

4. Tanlovni yuqori saviyada o'tkazish, ishtirokchilarning hujjatlarini qabul qilish hamda saralash uchun universitet rahbariyati va mas'ul xodimlaridan iborat Tanlov komissiyasi faoliyati yo'lga qo'yiladi.

5. Komissiya tarkibi univesitet rektorining buyrug'i bilan tasdiqlanadi hamda toq sonli a'zolaridan iborat bo'ladi.

6. Komissiyasi a'zolari nomzodlarni ko'rib chiqish, muhokama qilish va ovoz berishda teng huquqqa ega.

7. Komissiya o'z faoliyati ochiq-oshkora, adolatli, shaffof hamda qonunchilikda belgilangan tartib-qoidalar asosida olib boradi.

8. Komissiya faoliyati davomida mansab soxtakorligi, manfaatlar to'qnashuvi, ishtirokchilar bilan til biriktirilishi yoki korrupsion holatlarni oldini olish va tanlovni shaffof o'tkazilishiga komissiya raisi javobgar hisoblanadi.

9. Tanlovga 27-fevral kuni start beriladi. Universitetda faoliyat yuritayotgan ayol xodimlar ikki ish kuni davomida Ma'naviyat va ma'rifat markazi tomonidan ro'yxatdan o'tadilar hamda o'zlari (faoliyati, amalga oshirgan ishlari hamda yutuqlari) haqida ma'lumot taqdim etadilar.

6. Ma'naviyat va ma'rifat markazi nomzodlarning hujjatlarini umumlashtirib komissiyaga taqdim etadi.

7. Komissiya 1-2-mart kunlari nomzodlarning hujjatlarini, ularning faoliyatini atroflicha ko'rib chiqadi hamda muhokama qiladi. Zaruratga ko'ra nomzodlarning faoliyatiga to'liqroq aniqlik kiritish maqsadida tegishli tarkibiy bo'linmalardan ma'lumot olish, nomzodlar to'g'risida universitet jamoasining fikrini bilish maqsadida qisqa so'rovlar amalga oshirilishi mumkin.

8. Muhokamalar natijasi yuzasidan 2-bandda ko'rsatilgan nominatsiyalarning har biri bo'yicha 3 nafardan nomzod saralab olinadi hamda ovozga qo'yiladi.

9. Saralangan nomzodlar haqidagi ma'lumotlar (rasmlari bilan) digital.tsul.uz platformasiga joylashtiriladi.

10. Nomzodlarga digital.tsul.uz platformasining shaxsiy kabineti orqali universitetning barcha xodimlari ovoz berishlari mumkin.

11. Ovoz berish jarayoniga 3-mart kuni soat 00.00 da start beriladi hamda 4-mart kuni soat 23.59 da yakunlanadi.

12. Universitet ayollari faqat bitta nominatsiya bo'yicha ishtirok etishi mumkin.

III. Rag'batlantirish

13. Ovoz berish natijasiga ko'ra eng ko'p ovoz to'plagan nomzodlar nominatsiya g'olibi deb topiladi.

14. G'oliblar 8-mart – Xotin-qizlar kuni bayrami munosabati bilan universitetda o'tkaziladigan bayram dasturi davomida tantanali tarzda taqdirlanadilar.

15. Go'liblarga nominatsiya bo'yicha diplom, tanlov statuetkasi (nominatsiya nomi yozilgan) hamda 32 dyumli televizor bilan taqdirlanadilar.

IV. Yakuniy qoidalar

16. Tanlovni o'tkazish jarayonidan norozi bo'lgan ishtirokchilar universitet rektoriga murojaat qilishi mumkin.

17. Ko'rik-tanlovni tashkil etishda mansab suistemolligi, bir ishtirokchiga yon bosish, til biriktirish, korrupsion holatlar yoki boshqa qonunga xilof harakatlar aniqlanganda ushbu holatni yuzaga kelishiga sabab bo'lgan ishtirokchilar va boshqa xodimlar qonun hujjatlari va universitetning ichki me'yoriy hujjatlariga muvofiq javobgar bo'ladilar.

18. Ko'rik-tanlov jarayonida yuzaga keladigan shikoyatlarni, nizo va kelishmovchiliklarni ko'rib chiqish qonun hujjatlariga muvofiq amalga oshiriladi.

**“Yurist ayollar” tanloviga kelib tushgan arizalarni ko‘rib chiqish
bo‘yicha komissiya tarkibi**

- | | |
|--|--|
| 1. Xashimhonov Axror Mo‘minovich | Yoshlar masalalari va ma‘naviy-ma‘rifiy ishlar bo‘yicha birinchi prorektor, komissiya raisi; |
| 2. Rustambekov Islombek Rustambekovich | O‘quv ishlari bo‘yicha prorektor – TDYU qoshidagi akademik litsey direktori, a‘zo; |
| 3. Xodjayev Baxshillo Kamolovich | Ilmiy ishlar va innovatsiyalar bo‘yicha prorektor, a‘zo; |
| 4. Umarov Dilshodjon Ma‘rufovich | Xalqaro hamkorlik va uzluksiz ta‘lim bo‘yicha prorektor, a‘zo; |
| 5. Iminov Azizulla Abdulatibovich | Moliya-iqtisod ishlar bo‘yicha prorektor, a‘zo; |
| 6. Xaknazarov Azizbek Begmuradovich | Talabalar orasida ijtimoiy-ma‘naviy muhit barqarorligini ta‘minlashga mas‘ul bo‘lgan rektor maslahatchisi, a‘zo; |
| 7. Xosilov Erkin Dilmurotovich | Korrupsiyaga qarshi ichki nazorat bo‘limi boshlig‘i, a‘zo; |
| 8. Mamanazarov Sardor Shuxratovich | Kadrlar bo‘limi boshlig‘i, a‘zo; |
| 9. O‘razaliyev Murodbek Qorayevich | Universitet kasaba uyushmasi raisi, a‘zo; |
| 10. Azimov Xakimali Imomovich | Umumta‘lim fanlar va madaniyat kafedrası professori v.b., a‘zo; |
| 11. Xaydarova Umida Po‘latovna | Xotin-qizlar masalalari bo‘yicha maslahat kengashi raisi, komissiya kotibi. |

Izoh: Komissiya a‘zolari boshqa ishga o‘tganda yoki xizmat xazifalarini bajara olmaydigan holatlar yuzaga kelganda ularning o‘rniga ushbu lavozimga yangidan tayinlangan yoki vazifa yuklatilgan boshqa xodimlar komissiya tarkibiga kiritiladi.